



LINYON

Piblikasyon Linyon Demokratik Seselwa

Vol. 4

No. 2

Le 15 Mars, 2019

LAVERITE DAN NOU LISTWAR *Fineray deta i tourn an propagann politik*



Portre dan nou listwar - Albert Rene koman Premye Minis avek James Mancham koman Prezidan zour lendepandans. Me apre sa in annan kou deta!

I dezapwentan ki fineray an-syen Prezidan Albert Rene in en lokazyon propagann politik plito ki rekonsilyasyon nasyonal. Ti zipoze en fineray d'eta, me olye leta se plito Parti Lepep/US ki'n pran sarz.

Levenman ki montre sa kler, se ki serten dimoun ki'n vin kot fineray an tou respe ti ganny ensilte. Sa ti enkli lider politik e zournalis ki ti ganny war koman pe kritik Parti Lepep/US.

En lanterman i sipoze lokazyon pour montre respe, e alor sa ki vin lanterman i bezwen ganny resevwar avek respe, me sa pa ti leka. Ou kapab pous dimoun ki vin maryaz san ganny envite, me ou pa pous dimoun dan lanterman.

Apard sa, tou mwayen in ganny servi pour sant laglwar Msye René,

san respe pour laverite e santiman pour bann viktim son bann desizyon.

Ler lanmor ti ganny anonse LDS ti eksprim respe, me ti osi demande ki i vin lokazyon pour rekonsilyasyon. Ni deroulman fineray ni bann temwanyaz pa'n respekte sa.

Bokou dimoun ki ti siport Msye Rene i dir ki i ti annan bon lentansyon e en vizyon pour Sesel e akoz sa zot ti siport li. Si sa i leka, nou bezwen demande osi ki zot pa esey efas laverite e proklanm en versyon listwar ki fo. Laverite i bezwen ganny rekonnèt.

Son rikord lo drwa imen e manyer in diriz pei i osi bezwen ganny met dan balans. Nou annan en devwar, sirtou anver viktim bann aksyon : disparisyon, mert prizon, lekzil e viktimizasyon poli-

tik. I enportan pou met sa bann keksoz osi lo rikord pour fer sir ki i pa ariv ankor.

Depi 1993, nou'n fer serten pa pour ranvers bann keksoz mal. Liberte politik e lekspresyon lib in ganny rekonnèt, ansanm avek lezot drwa imen. Ledikasyon in war nouvo laliberte. Direksyon ekonomik in ganny revize. Se sa direksyon ki nou bezwen kontinye.

Lanmor Msye Rene in termin en letap dan nou listwar. Byento, Komisyon lo Laverite e Rekonsilyasyon pour komans son travay. Sa i devre osi vin lokazyon pour anmenn linite olye ki nou kontinyen ganny divize par sa ki'n arive.

Koman Seselwa, nou bezwen gete ki manyer nou pou kontinye koriz bann fot lepase e batir nou lavenir olye lager lo lepase.

Problenm lalkol: En size pou pran serye

Dan diskour Leta Lanasyon, size ki'n ganny plis latansyon se propozisyon pou kontrol litalizasyon lalkol.

An zeneral, dimoun i dakor ki annan problenm grav, e ki fodre rod solisyon. Me diferans lopinyon se lo ki manyer pou rezourd nou problenm.

Prezidan Faure in fer serten propozisyon tel ki limit laysens pour prodiksyon, termin laysens vann lalkol dan Lari Bazar, restrikte piblisite, sanz sistenm tarif e separ lavant lalkol avek lezot komodite dan laboutik.

Fodre gete lekel ki pou efektiv e lekel ki pou zis anbaras konsomater san ki i annan okenn lefe.

Fodre komanse avek en lobzervasyon kle. Problenm labi lalkol pa pou ganny rezourd toultan ki dimoun



pa sanz latitud. Lalkol in ankre dan kiltir Seselwa e nou bezwen en sanzman profon pour met li anba kontrol. Tou lezot mezir i zis lasistans e sipor, me pa solisyon dan zot-menm.

Mezir pli esansyel se anpes bann labwason ki vreman fer ditor parey bann ronm 'pti ponm'. Anpes piblisite e kontrol ler vann lalkol i kapab ede. Anpes laboutik ordiner vann lalkol pa pou vo lapenn akoz i pou zis kree 'black market' lalkol.

Martin Aglae i rod domaz ek LDS

Martin Aglae in anmenn de ka ankour kont LDS. Enn i anba non Linyon Sanzman e lot i anba non Lafors Sosyal Demokrat. Sa i 2 parti politik ki Aglae e lezot dimoun avek li ti formen pour swadizan konteste eleksyon 2016, me ki ti ganny rezete par desizyon Lakour Siprenm.

Me Aglae pa pe zis pourswiv LDS. Son petisyon i osi kont Komisyon Elektoral, Ziz Durai Karunakaran, e menm Rezistrar Lakour Siprenm.

Biro Atorni-Zeneral in reponn ka kont Ziz ek Rezistrar avek largiman ki ou pa kapab met zot ankour. Sa i pa permet anba Konstitisyon. Dan son kote, LDS pe dir ki i son drwa konstitisyonel pour al kot Lakour si i santi ki son drwa in ganny afekte. Konsitasyon

i donn tou sitwayen drwa pour al devan lakour e i pa bezwen plis ki sa.

LDS ti obzekte kont lanrezistremman Linyon Sanzman akoz in ti'n servi sa non e tou dimoun ti asosye group bann parti parti politik dan LDS avek sa non. I ti osi obzekte kont lanrezistremman Lafors Sosyal demokratik akoz son akronym LSD ti pou ganny konfize avek LDS.

LDS ti ganny premye ka devan lakour siprenm me sa desizyon ti ganny ranverse dan Lakour Dapel. Prezan Aglae pe sey pourswiv LDS, Komisyon Elektoral, Ziz ek Rezistrar pour ganny domaz. In demann R5.8 milyon.

Akoz zafer i ankour, nou evite fer lezot komanter ziskan ler zizman in donner.

Tou Seselwa i kalifye pour aste later

Dan nouvel sa semenn, nou'n ganny dir ki 1841 dimoun in fer laplikasyon pour aste en bout later dan Land Bank, me ladan zis 226 ki'n kalifye. Savedir, 1615 pa'n kalifye?

Sa rezilta pa rezonab. Tou Seselwa i kalifye pour aste en bout later Land bank. Sel kondisyon ki nou kapab mete se si i kapab peye, e si i vreman bezwen, par ekzanp si i napa en lot bout later. Posibilite ganny en bout later pour fer en lakaz i drwa tou Seselwa. Alor, sa bann zafer kalifikasyon i zis gonaz.

Dan sa bann ka ki'n ganny anonse, nou'n aprann ki kalifikasyon ti si ou ti annan R800,000 pour fer en lakaz obyen si lafanmir pe anmenn omwen R15,000 kot lakour tou le mwa. Apre premye rezilta, sa bann sif in ganny revize pour vin R550,000 e R12,000 respetktivman. Prezan, 433 pou kalifye. Me, sa osi pa fer sans.

Si ou dir nou ki ti annan zis 433 morso later pou vann, alor nou konpran. La ou deside donn bann ki priorite. Me si i annan later, e en dimoun napa lot later obyen lakaz, ki manyer i pa kalifye pour aste en bout.

I paret ki kalifikasyon i baze lo en dimoun kapab fer en lakaz an blok, lo standar ki gouvrenman in deside. Sa pa fer sans. En dimoun pa bezwen R800,00 pour komans en lakaz. Les li fer lakaz ki i kapab pour le moman. Sa ki esansyel se ki i ganny en twa. Napa dimoun ki pa pou sey fer pli bon lakaz ki son mwayen i permet. Si i pa fer li ozordi, i a fer li apre, me son drwa aste en morso later ek leta i la.

Kalifikasyon i senpleman si ou bezwen, e ki ou en Seselwa. Napa plis ki sa.

NOTIS POUR ZABITAN ROCHE CAIMAN

Onorab Jany DeLetourdi I anons zabitan Roche Caiman ki son lofis I aprezan kot Lakaz Seselwa, Mont Fleuri. Pou servis obyen apwentman, zot kapab kontakte Onorab DeLetourdi lo nimer 2545498 obyen Chantal lo nimer 2635778.